

欽
定
全
唐
文

欽定全唐文卷二十目錄

元宗一

喜雨賦

鵲鵲頌

答賈曾令

將行釋奠禮令

受禪制

褒魏知古進詩手制

賜魏知古手制

命張說等與兩省侍臣講讀制

授姚元之兵部尚書同三品制

封張暉制

授張說中書令制

大赦制

賞定策功臣制

遣使宣撫諸道制

加封魏知古陸象先制

科屠割刑人骨肉者制

封張說褚无量制

幸東都制

封突厥可汗夫人呂氏孫氏制

加宋王成器等三公制

加劉幽求實封制

加宋王成器開府儀同三司制

授解琬朔方道後軍大總管張知運副大總管制

舉堪充將帥制

答張說進上黨舊宮述聖頌制

斥李嶠制

授盧懷慎同平章事制

授陸象先益州大都督府長史制

封葉法善越國公制

授崔據張恣朝散大夫制

黜陟内外官制

授王晙朔方道行軍總管制

封郭虔瓘郭知運制

欽定全唐文卷二十

元宗皇帝一

帝諱隆基睿宗第三子垂拱元年生三年封楚王長壽二年降封臨淄郡王韋后矯詔稱制帝定策討亂拜殿中監唐隆元年進封平王睿宗即位立爲皇太子監國延和元年七月即位累加尊號開元天地大寶聖神文武孝德證道皇帝至德元載七月禪位冊爲上皇天帝在位四十五年七十八謚曰至道大聖大明孝皇帝廟號元宗

喜雨賦

仰重華於齊政步文命之彝倫何天道之云遠亦明徵之
在人迄中夏而自春遘憊陽而爲亢雲重結而復解雨纔
滴而還障山祠植珪而不答田畯倚耒而怊悵京兆來奏
晉官撰曲將土龍而矯首請神巫而頓足彼有憑而可舉
予何抑而未許恐歲凶之及人寧天譴於我身爾乃潔齋
壇墀五精是祠暴立炎赫三日爲期上帝臨我衷誠不欺
重泉蒸潤觸石吐滋平雲黯而鋪幕密雨森其散絲無雷
無電不震不眩匪疾匪徐乍合乍踈泛草泊樹垂珠點露
過闕入樓含煙雜霧或噴薄而攢集或淋漓而灌注亂積

水之圓文拂微風之斜度寰海浹而康樂畎畝欣而相顧
絲管合今夜將曉芙蓉開今日未暮原夫雨之爲德也無
小大之異情無高卑之不平無華朽之偏潤無臭薰之隔
榮喜夫雨之今應也起一言而不舍經累辰而廣瀉納清
陰之浮涼同顥氣之飄灑感作霖於殷命諷其滂於周雅
家尚知乎禮節國有望於豐霸小陽臺之神人却大宛之
走馬觀雲行而雨施吾何事乎天下

鵲鵲頌

并序

朕之兄弟唯有五人比爲方伯歲一朝見雖載崇藩屏而

有睽談笑是以輟牧人而各守京職每聽政之後延入宮
掖申友于之志詠棠棣之詩邕邕如怡怡如展天倫之愛
也秋九月辛酉有鵲鴿千數棲集於麟德殿之庭樹竟旬
焉飛鳴行搖得在原之趣昆季相樂縱目而觀者久之逼
之不懼翔集自若朕以爲常鳥無所志懷左清道率府長
史魏光乘才雄白鳳辯壯碧雞以其宏達博識召至軒楹
預觀其事以獻其頌夫頌者所以揄揚德業褒讚成功顧
循虛昧誠有負矣美其彬蔚俯同頌云

伊我軒宮奇樹青葱藹周廬兮冒霜停雪以茂以悅恣卷

舒兮連枝同榮吐綠含英曜春初兮
蓐收御節寒露微結
氣清虛兮桂宮蘭殿唯所息宴樓雍渠兮
行搖飛鳴急難
有情情有餘兮顧惟德涼夙夜兢惶慙化踈兮
上之所教
下之所效實在予兮
天倫之性魯衛分政親賢居兮爰遊
爰處爰笑爰語巡庭除兮觀此翔禽以悅我心
良史書兮

答賈曾令

比嘗聞公正直信亦不虛寡人近日頗尋典籍至於政化
偏所留心女樂之徒亦擬禁斷公之所言雅符本志

將行釋奠禮令

夫談講之務貴於名理所以解疑辯惑鑿瞽開聾使聽者聞所未聞視者見所未見爰自近代此道漸微問禮言詩惟以篇章爲主浮詞廣說多以嘲諢爲能遂使講座作俳優之場學堂成調弄之室嗇夫利口可以驤首先鳴太元雋才自當俛首垂翅捨茲確實競彼浮華取悅無知見嗤有識假令曹張重出馬鄭再生終亦藏鋒匿銳閉關却掃者矣寡人今旣親行齒胄躬詣講筵思聞啟沃之談庶叶溫文之德其侍講等有問難釋疑不得別構虛言用相凌忽如有違者所司量事糾彈

受禪制

門下繼明嗣德王者所以承天尊祖奉先聖人所以崇孝
敬上之禮著乎重華月朔之祠襲乎文命猗歟作頌發流
濬哲之祥清廟升歌思表配天之業厯選前載可得而言
我國家首出開元繼文膺統七代觀德至道洽於生人三
后在天垂裕光於後嗣太上皇帝道超寰表功軼帝先名
言不測於乾行仁智不知於日用累讓神器非以黃屋爲
尊俯膺大寶蓋爲蒼生屈志黎人於變淳化斯登載懷脫
屣疇咨菲薄竭讓德之志天眷莫迴陳拜首之誠中襟逾

邈遂以寡昧祇踐宸居循顧紹庭載深寅畏爰撰初吉躬
展肅雍虔肆獻之儀申大號之典神保之饗斯洽介福之
道攸宣億兆同歡人祇同慶恭承聖訓申茲霈澤可大赦
天下

褒魏知古進詩手制

卿所進獵渭濱十韻三復研精良增嘆美夫詩者志之所
以寫其心懷實可諷諭君主是故揚雄陳羽獵馬卿賦上
林爰自風雅率由茲道予頃向溫泉觀省風俗時因暇景
掩渭而畋方開一面之羅式展三驅之禮躬親校獵聊以

從禽豈意卿有箴規輔予不逮自非款誠夙著其孰能繼
於此耶今賜卿物五十段用申勸獎

賜魏知古手制

卿以宰臣往知大選官人之委情寄尤切遂能端本革弊
忘私徇公正色而行厝心不撓鏡已澈則妍媸必鑒衡已
舉則輕重罔違朕遠聞之益用嘉歎今賜衣裳一副以示
所懷

命張說等與兩省侍臣講讀制

先王務本君子知教化人成俗理國齊家必由於學矣朕

往在儲宮旁求儒雅則張說褚无量等爲朕侍讀詩不云
乎如切如磋如琢如磨斯之謂也咸能發揮啟迪執經尊
道以微言匡菲德者朕甚休之自虔奉聖訓祇膺大寶冀
天下學士靡然向風實獲我心登於近侍復欲勉聽虛佇
論思獻納孔子曰德之不修學之不講是吾憂也豈食而
不知其旨耕而不知其耨將何以因於義求於善補朕之
闕誨人罔倦哉宜令銀青光祿大夫守中書令上柱國燕
國公張說銀青光祿大夫右常侍崇文館學士兼國子祭
酒上柱國舒國公褚无量等公務之暇於中書與兩省侍

臣講讀其有昌言至誠可體要經遠者仍令銀青光祿大夫行黃門侍郎昭文館學士上柱國中山郡開國公李义銀青光祿大夫行中書侍郎兼知制誥上柱國成安縣開國男蘇頲與左右起居隨事編錄三兩闕進朕將親覽庶施乎海內始自京師鳳沼擅鴻都之遊中書有稷下之事應須紙筆鋪設等令中書檢校供擬

授姚元之兵部尚書同三品制

門下王佐之重師兵之任旁求棟幹膺此具瞻同州刺史姚元之宏略冠時偉才生代識精鑒遠正詞強學有忠臣

之操得賢相之風累踐臺衡匡益斯在頃居藩郡循良是屬載懷一德分命六官訐謨允歸文武兼濟式憑帷幄之算宜副韜鈴之委可兵部尚書同中書門下三品

封張暉制

門下疏爵列土是稱王制大功盛德必建侯封銀青光祿大夫大理卿張暉守道恭懿飭躬明哲誠亮邦國實繁於華愛同君親忠出於孝比者潛申翊戴屢挫兇慝故以議存謀始防在慮先披荆之效不渝採葛之讒遂起粵自荒裔升於王朝追朱佑之前言深啟於天命指蕭何之舊事

獨高於人傑思宏賞典用載盟書惟鄧樂郡陪京奧壤宜
賜茅社永旌采地可封鄧國公賜實封三百戶餘如故主
者施行

授張說中書令制

門下殷命百工傳膺審象漢推三傑良屬運籌不有斯人
孰賚予弼尚書左丞張說居正合道體直理精朕昔在承
華首延博望談經之際欽若讜言撝翰之間潤色鴻業屢
陳匡益見嫉姦回頃雖抗迹疎遠而載懷飢渴今羣兇已
服大猷伊始永言亮采光朕側席之期俾咨啟沃成朕濟

川之望宜登鼎鉉式綜絲綸可中書令

大赦制

朕承累聖之洪休荷重光之積慶昔因多難時屬遘屯寶位深墜地之憂神器有綴旒之懼事殷家國義感神祇吟嘯風雲龔行雷電致君親於堯舜濟黔首於休和遂以孟秋允升儲貳旋承內禪繼體宸居拜手之請空勤讓立之誠莫展恭臨億兆二載於茲上稟聖謨下凝庶績八荒同軌瀛海無波不謂姦慝潛謀蕭牆竊發逆賊竇懷貞等並以庸妄擢在朝廷毫髮之效未申邱山之釁仍積共成梟

獍將肆姦回太上皇聖斷宏通英謀獨運命朕率岐王範
薛王業等躬事誅鋤齊斧一麾凶渠盡殪太陽朗耀澄氛
靄於天衢高風順時厲肅殺於秋序神靈叶贊夷夏相歡
四族之慝旣清七百之祚方永爰承後命載闡休期總軍
國之大猷施雲雨之鴻澤承乾之道旣光被於無垠作解
之恩思式覃於品物當與億兆同此維新可大赦天下大
辟罪已下咸赦除之邠王守禮加實封三百戶宋王成器
申王成義各加實封一千戶岐王範薛王業各加實封七
百戶文武官三品已上賜爵一級四品已下各加一階內

外官人被諸道按察使及御史所通惡狀咸宜洗滌選日
依資敘用

賞定策功臣制

大臣立事夷險不易良相升朝安危所繫兵部尚書同中
書門下三品郭元振偉材生代宏量鎮時經綸文章今之
王佐出入將相古之人傑夙侍帷扆疇咨廟堂思志堯舜
以期管樂朕往在儲闈洎登寶位每觀其人聞義感激願
判忠邪立誠慷慨密陳宏益爾其至矣朕實嘉之頃者梟
獍興謀干戈作釁太上皇命朕除討元振又馳奉宸極始

則賚予爲弼終則寧朕問安可謂格於皇天貫於白日元
惡旣翦物共爲新昌言是圖朕豈忘舊宜開井邑永誓河
山元振可封爲代國公食實封四百戶賜物一千段以前
中書侍郎王琚爲戶部尚書封趙國公食實封三百戶殿
中監姜皎爲工部尚書封楚國公食實封五百戶太僕少
卿王守一爲太常卿封晉國公食實封五百戶殿中少監
李令問爲殿中監封宋國公食實封五百戶

遣使宣撫諸道制

昔者明王之御天下也內有公卿允釐庶績外有方伯司

牧羣黎猶懼至道未孚淳風或替故有巡狩之典黜幽陟
明行人之官省方察俗用能遐邇咸乂情僞無遺於變時
雍率其道也朕祇膺嗣德恭守帝圖上稟過庭之謨下憑
衆庶之力竭精思理兩載於茲冀逮小康漸躋至化而區
宇遐曠風教未同負宸長懷責深在已近者姦回構釁竊
起蕭牆宗社降靈應時殲殄今又恭承聖訓總統大猷率
彼百官齊茲七政恐倉廩不實禮節未興吏靡息於貪殘
人或滯於幽枉永言於此明發疚懷今卜征未習時邁仍
遠宜分命輜軒慰撫黎庶畢構等並操履公清識見明允

茂績彰於歷試嘉譽滿於周行宜膺行李載光原隰所至
之處申諭朕心並令屏絕浮華敦崇仁厚務修孝弟勤事
農桑耆老鰥寡征人家口不自存者咸加恤問德舉言揚
惟賢是急若有良才異行藏器下僚哲人奇士隱淪屠釣
審知才行灼然者各以名聞凡百牧宰洎乎吏人咸悉朕
心各敬乃事勤則不匱仁遠乎哉勉矣勗之以副朕意

加封魏知古陸象先制

侍中兼太子左庶子梁國公魏知古中書侍郎同中書門
下三品陸象先頃屬艱虞殲殄凶醜咸能倉卒之際志不

顧身訏謨之初邪莫干正有罪斯服抑惟王典無言不酬
以勸臣節俾加茅土式寵鹽梅知古賜食實封二百戶物
二百段象先封充國公食實封二百戶賜物五百段

科屠割刑人骨肉者制

凡有刑人國家常法掩骼埋胔王者用心自今已後輒有
屠割刑人骨肉者依法科殘害之罪

封張說褚无量制

无量執經傳禮敷暢微言俾予遊夫子之門知先王之道
者侍講之功也說又定策監撫謀始危言防萌屯難慮終

竭節以身許國其誠動天夫爵有德封有功眷彼茂勤宜
宏賞典以桓榮之稽古況蕭何之指蹤是用欽若朝經差
其井賦說可封燕國公食實封二百戶无量可左散騎常
侍兼國子祭酒封舒國公食實封二百戶

幸東都制

咸維京師建都惟舊乃眷時邁卜征斯在朕承天纂歷恭
己臨人鼎俎雖甘念疲吐之不足宮室信美惕浮戶之未
安事內攢於千慮心外周於萬物則知帝業初起峻函乃
金湯之地天下大定河雒爲會同之府周公測景寔曰土

中總六氣之所交均萬方之來貢引魚鹽於淮海通稅紆
於吳越瞻彼雒汭長無阻饑自中宗入關於今八載省方
之典久而莫修遂使水漕陸輓方春不息勞人奪農卒歲
何望關東嗟怨朕實聞焉思欲寧人而休轉運館穀而就
教庾加以暑雨作害災沸秦川歲星有福祥歸豫野朕情
深救弊身豈懷安博考靈心審聽輿語上奉天以爲孝下
利人以爲忠順時而動從衆之願宜以今年十一月行幸
東都凡厥有司各恭乃事至於行從兵馬供頓貯積務在
撙節勿使煩勞考使選人咸令都集東都宮殿須理量加

補葺不得煩人朕本爲人而行非擬勞人自奉所過州縣無費黎元亦不得輒有差科旁求進獻宣布遐邇知朕意焉

封突厥可汗夫人呂氏孫氏制

門下突厥可汗夫人呂氏孫氏等毳幙來賓錦車將命單于侍子榮已列於漢庭關氏貴人寵宜加於蠻邸呂氏可封瀚海夫人孫氏可封納款夫人主者施行

加宋王成器等三公制

門下古有知道於通精辨於物可以調陰陽節風雨者委

之三事以康萬人鼎鉉之謂也司空兼揚州大都督上柱
國宋王成器益州大都督兼右衛大將軍申王成義單于
大都護兼右金吾衛大將軍邠王守禮等並明德茂親崇
儒樂善爲國翰屏當朝羽儀豈其朱第之詩美則緇衣之
詠寧止愛均花萼禮錫苴茅而已哉必能論道經邦佐朕
爲政俾允升台之望宜膺補袞之闕成器可太尉兼揚州
大都督成義可司徒兼并州大都督守禮可司空勲如故
主者施行

加劉幽求實封制

門下忠而獲戾時所嘆息賞以念勤邦之懿典金紫光祿
大夫守尚書左僕射知軍國重事監修國史上柱國徐國
公劉幽求長才偉度博聞強學周百慮以匡社稷竭一心
而在廟廊故能見大義臨大節智可以不俟終日誠可以
格於皇天曩者恭參誅呂款深從代宏宣王化保乂朕躬
政方議於調鉉謗遂興於盈篋良相非罪空弔長沙古人
有言寧恩曲突自翦元惡旋居左揆利更稱於狐偃勲莫
逮於蕭何兼而有之義固無賜宜加土宇永傳帶礪可加
賜食實封二百戶餘如故主者施行

加宋王成器開府儀同三司制

宋王成器溫良恭儉明允篤誠朕之元昆人之師表間者
鼎席虛位臺陞俟能堅守辭讓願移成命宜聯華於補職
更參議於論道可開府儀同三司

授解琬朔方道後軍大總管張知運副大總管制
門下鼓旗中軍是推元帥熊羆後勁亦屬武臣金紫光祿
大夫行左散騎常侍上柱國濟南郡開國公解琬學窮經
史才蘊韜略握兵之要克壯其猷右領軍衛大將軍兼檢
校單于大都護鎮守大使上柱國長平郡開國公張知運

久鎮邊庭備詳虜態奪劒之勇隱如敵國並師旅是習獮
戎所憚陰陽勝負成誦在心山川向背若指之掌寒膠已
折秋草具肥宜屯細柳之營俾作皋蘭之氣琬可充朔方
道後軍大總管知運可充朔方道後軍副大總管並準例
發遣主者施行

舉堪充將帥制

將帥之任軍國斯重禦侮干城良才是急頃武臣多闕戎
政莫修聆鼓鼙以載懷筮熊羆而未遇古今一也何代無
人南仲方叔之儔亦在用之而已宜令京文武官及朝集

使五品以上方舉堪充將帥者一人明黜幽側無限年位務求實用以副予懷

答張說進上黨舊宮述聖頌制

往者中宗違代國步微艱天祚我唐大命集於睿宗大聖貞皇帝朕以寡昧嗣守丕業虔奉遺訓不敢怠遑至天地休徵神人靈貺皆先帝聖德之餘慶朕何力之有焉至若登太行留上黨頌功業建都畿休兵太原爲農睢上並國之典禮朕奉行之何足稱者而羣臣固請紀頌衆心難違卿藻思菁華揚過其實自視虛缺爲媿尤多

斥李嶠制

事君之節危而不變爲臣則忠貳乃無赦特進趙國公李嶠往緣宗韋弒逆朕恭行戡定揖讓之際天命有歸嶠有窺覲不知順逆狀陳詭計朕親覽焉以其早負辭學累居台輔忍而不言特掩其惡今忠邪旣辨具物惟新賞罰儻乖下人安勸雖經赦令猶宜放斥矜其老疾俾遂餘生宜聽隨子虔州刺史暢赴任

授盧懷慎同平章事制

門下宰輔之任謨猷是屬不有大才孰康景化黃門侍郎

盧懷慎貞良敦樸孝悌仁厚度量深於江海堅清邁於冰雪事皆體大詎觀非聖之書心必在公雅契維賢之典故能危言正色直道匪躬比之微管而求得說宜寵瑣闡參乎鼎座可同紫微黃門平章事

授陸象先益州大都督府長史制

入而弼政雖佇忠賢出則分憂更資循理中書侍郎同中書門下平章事三品充國公陸象先體含清雅識備貞慤早修學行實允蕃明三蜀稱殷一都之會重寄爲邦朝難其選朕光宅四海康惠兆人乃眷所先必自於遠故端寮

載舉重臣攸屬可益州大都督府長史劔南按察使

封葉法善越國公制

道士葉法善德包貞素學究元微預覩豐萌亟申忠款宜
加寵命以答懋功仍遂乃懷俾從真服可授金紫光祿大
夫鴻臚卿越國公兼景龍觀主

授崔璩張恣朝散大夫制

崔元暉張柬之等往以神龍之初保乂王室奸臣所忌譴
居炎海流落變衰感激忠義元暉嗣子吏部郎中璩清才
遠韻謹守專直柬之嫡孫恣祖考繼歿遺孤可傷彼勲業

之下淪佇名賢之必復是得景倩而悲仲宣者也高皇封樂毅之後武帝求蕭何之裔斯不遠哉昭於德音緬懷前烈宜加後命璩琚並可朝散大夫

黜陟内外官制

朕聞天爲大者孰先於育物物最靈者莫甚於愛人故樹之后王以康兆庶緬鑒前烈深爲遠圖懼德之不修化之未偃寅畏夙夜如臨泉壑然則疇咨命於四岳黜陟在乎三載旣以百姓爲心明非一人獨理今之牧守古稱侯伯賢者任之則循良之跡著不賢者任之則怨苦之聲作每

冀精於所擇委之俞往豈時或頽靡苟且尚多何吏之殊
尤寂寞不嗣靜言政要朕用憮然間歲水旱周於郡國倉
廩不蓄閭閻薦饑加以黜陟頗多冗官增弊至於處置皆
憑次舉當於京官內簡宏才通識堪致理興化者量授都
督刺史等官在外藩頻有升進狀者量授京官使出入嘗
均永爲常式課最超等必議升選循默守常必加黜免昭
昭賞罰可不慎歟昔子產相鄭以致和平曹參相齊貴於
清靜清靜則不擾不擾則和平和平則不爭不爭則知恥
愛費而與休息除煩而從簡易自當農者歸隴畝蠶者勤

績紡旣富而教乃克有成道德齊禮不遠斯復庶幾在位知朕此心

授王峻朔方道行軍總管制

黃門古者獫狁孔熾匈奴浸驕則設以三策雖屬備胡之典方於五材未聞去兵之義不有行者誰能捍之正議大夫行鴻臚少卿上柱國朔方軍副大總管王峻倜儻多智堅剛竭節每讀前史思齊古人辭家而志滅獯戎報國而躬先將校頃虞南牧城彼朔方蕭關洞開沙漠無事旣獲全軍之利則維保塞之勞嘉其吾謀必有成績昔北逐虜

者任專而決外西護羌者功遂而條上用明分間之重式
副齊壇之期朝實僉諧爾其俞往可持節充朔方道行軍
大總管仍兼安北大都護豐安定遠三城等軍及側近州
軍宜依舊例並受賧節制其安北都護府移於中受降城
安置兵須足食理藉加屯今正農時務及耕種并緣邊兵
募亦委量事通融苟非切便即闕停減總處置訖奏聞即
馳驛準例發遣主者施行

封郭虔瓘郭知運制

朕聞賞有功報有德者政之急也若功不賞德不報則人

何謂哉雲麾將軍檢校右驍衛將軍兼北庭都護瀚海軍
經略使金山道副大總管招慰營田等使上柱國太原縣
開國子郭虔瓘宣威將軍守右驍衛翊府中郎將檢校伊
州刺史兼伊吾軍使借紫金魚袋上柱國郭知運等早負
名節見稱義勇頃者柳中金滿偏師禦敵蕭條窮漠之外
奔迫孤城之下強寇益侵援兵不至旣守而戰背秋涉冬
櫪馬長嘶戍人遠望謀以十勝成其九拒遂能摧日逐之
遺種斬天驕之愛息豈耿恭班超獨高前史將廉頗李牧
與朕同時眷言茂勲是所嘉歎信可以疇其井邑昭示遐

邇俾勞臣勸而懦夫立焉虔瓘可進封太原郡開國公知
運可封介休縣開國公

欽定全唐文卷二十一目錄

新文藝出版社藏書

元宗二

答宋王成器等上表以興慶舊里宅爲宮制

禁百官與僧道往還制

薛訥除名爲庶人制

授岐王範華州刺史薛王業同州刺史制

命李延昌等屯兵秦州制

親征吐蕃制

立郢王嗣謙爲皇太子制

贈竇希玠尚書左丞相制

量賞租庸如數制

封邠王守禮第二女華亭縣主制

禁厚葬制

贈王海賓左金吾衛大將軍制

封宋王成器長女安吉縣主制

授盧懷慎黃門監制

禁畜別宅婦人制

春令行赦制

賜高麗莫離支及吐谷渾等大首領爵賞制

授薛訥朔方道行軍大總管呂延祚杜賓客副總

管制

命徵辟東宮官屬制

選耆儒侍讀制

放散圍兵制

幸鳳泉湯制

授薛謙光東都留守元行沖副留守制

幸鳳泉降所過地方刑罪制

授邠王守禮襄州刺史制

授鄴王嗣直等都護制

封契丹李失活奚李大酺制

授源乾曜黃門侍郎同平章事制

授宋璟吏部尚書蘇頌同平章事制

贈王友貞銀青光祿大夫制

命故密王元曉再從孫徹嗣爵制

并州置天兵軍制

移蔚州橫野軍於代郡制

征突厥制

賜隱士盧鴻一還山制

封突騎施蘇祿順國公制

欽定全唐文卷二十一

元宗二

答宋王成器等上表以興慶舊里宅爲宮制

朕昔與弟兄聯居藩邸虔奉聖訓遂膺昌期嘗思鄴杜之遊頗有芒碭之氣王等固陳符瑞取則不遠擬備巡幸推而弗居雖府在京師亦同於譙沛式遵故事宜依今請

禁百官與僧道往還制

如聞百官家多以僧尼道士等爲門徒往還妻子等無所避忌或詭託禪觀妄陳禍福事涉左道深歎大猷自今已

後百官家不得輒容僧尼道士等至家緣吉凶要須設齋
皆於州縣陳牒寺觀然後依數聽去仍令御史金吾明加
捉搦

薛訥除名爲庶人制

出師不臧本於喪律責帥歸罪聞於記言并州大都督府
長史兼左衛大將軍和戎大武等諸軍州節度大使同紫
微黃門三品薛訥頃者總戎禦邊建議爲首暗於料敵輕
於接戰張我王師劒之虜境偏裨失節乃斯令之不明中
軍靡旗則厥謀之不振況鴈門斬級魏尚豈得論功馬邑

亡輜王恢必聞議罪進退之咎典刑攸屬且觀其疇昔頗
嘗輸罄每欲資忠效主見義忘身儻曹沫不死於辱終能
自奮秦赦孟明之敗漢從李廣之贖古常有矣朕每懷之
特緩嚴科俾期來效宜放其罪所有官爵並從除削

授岐王範華州刺史薛王業同州刺史制

黃門周以魯衛之親夾輔王室漢以間平之寵來朝京師
旁稽舊章允迪前訓太常卿兼左衛率并州大都督岐王
範荊州大都督兼祕書監薛王業等朕之同氣邦之偉才
周旋禮樂佩服儒雅爰職奉常則墜典咸秩是司外史則

羣言罔遺光我蕃猷敷於事典日同問安之慶時歸受制
之廷出入重於楚元始闕欽於沛獻家人撫愛雖屬於從
梁國史垂聲必期於分陝廼眷畿輔不遠閭閻漆沮旣從
河華作鎮削桐所寄磐石攸宜遂其至公之請佇聽牧人
之術範可使持節華州諸軍事兼華州刺史太常卿勲封
如故業可使持節同州諸軍事兼同州刺史祕書監勲封
如故至州日須稍優游不可煩以細務自非大事及奏事
餘並令上佐知主者施行

命李延昌等屯兵秦州制

朕聞天生五材廢一不可不教人戰是謂棄之我國家光宅天下守在海外後於弔伐之義豈窮兵以黷武先以威德之懷欲安人而和衆將戒不虞諒不獲已突厥比通和好頗負盟約不有金革孰寧疆場不有師徒誰扞牧圉昔者命彼南仲城於朔方軍出隴西勞於渭北此其備也今寒露腓草秋風揚塵必順時以致師方休農以簡卒我圖靖國其在綏邊衛尉卿兼檢校左金吾衛大將軍涼國公李延昌克樹勲庸遍該韜略關張萬人之敵勇不顧身程李二將之名忠於衛主董司戎事行料兵權可充隴右道

防禦大使左武衛將軍白道恭等居運六奇行謀百勝早
聞營平之議思覩票姚之捷可爲之副宜取朔方後軍兵
及前年朝堂應募健兒等總十萬人羣牧馬四萬匹於秦
州成蘭渭等州界逐便屯集教練仍書報贄普共爲聲援
明加偵候勿使失機

親征吐蕃制

朕聞夷不亂華旣殊於中外虜或犯塞必興於甲兵我國
家一戎定業累聖膺期于歐斯舞梯航畢至小蕃遠寇假
息游魂爰自昔年慕我朝化申以婚姻之好結爲甥舅之

國歲時往復信使相望繒繡以益其饒衣冠以增其寵鴻恩大造特加於蠻貊狼子野心遂同於梟獍在於亭障頗聞驚擾已命師徒遄往追躡摧凶殄逆今也其時滅迹掃塵期之不日然以問罪之義百王所以冀行戒嚴之典六軍所以親御是用中宵按劒昧曉求衣豈自逸於崇高而不勤於櫛沐眷茲右輔遠在西陲雖駐蹕之暫勞佇觀兵而決勝宜取今月擇日進發其差取後軍四萬人諸色蕃兵二萬人京兆府兵一萬人飛騎二萬人量追三百里內兵留當下人充萬騎五萬一千人豳隴兵各二千人岐州

兵五千人並集本州待進止其馬四萬匹取三百里內諸
廩及府馬充所追兵馬及押官委本州精簡赴集衛尉卿
兼檢校左金吾大將軍王毛仲爲左一軍總管右金吾將
軍康海源爲副左武衛大將軍李昌爲右一軍總管左武
衛將軍馬衛爲副左羽林大將軍趙成恩爲左二軍總管
右領軍將軍秦義禮爲副右羽林將軍楊敬述爲左三軍
總管右領軍將軍鮮于庭誨爲副左羽林將軍馬崇爲右
三軍總管右監門將軍執失善光爲副所司準式俾其長
驅隴坻深入湟中授以方略掃清氛祲其緣頓支供務從

省約

立郢王嗣謙爲皇太子制

樹之后王所以輯寧黎獻承之儲副所以安固宗祧故能
崇四術之科爲萬國之本長幼君臣之序齒胄知歸溫文
恭敬之風羣生攸屬古之制也其在茲乎郢王嗣謙聰睿
夙成端莊特秀三雍禮樂必也生知五官詞藻居然暗合
體道爲器非假於學問資靈授德自符於神解夏絃春誦
地義天經立人之道旣彰爲子之誠皆著今昇平在運中
外咸寧將有事於元良固不踰於三善宜光近日之敏俾

則前星之耀宜以來年正月四日備禮冊爲皇太子所司
準式

贈竇希玠尚書左丞相制

存有其榮歿有其贈古之典也希玠有賢戚之美登台階
之秩冀其永年俾作元老不幸薨逝用震悼於厥心可贈
尚書左丞相

量賞租庸如數制

凡諸郡縣仍令太守縣令課勸農桑先處分太守縣令在
任有增減戶口成分者所由司量爲殿最自今以後太守

縣令廉能勾當租庸每年加數成分者特賜一中上考如二載之內皆有成分所司錄奏超資與處分

封邠王守禮第二女華亭縣主制

黃門司空兼虢州刺史邠王守禮第二女王門誕秀師氏尚柔婉嫕凝芳閒和順則佇儀膏族俾錫脂田可封華亭縣主

禁厚葬制

自古帝王皆以厚葬爲誠以其無益亡者有損生業故也近代以來共行奢靡遞相仿效浸成風俗旣竭家產多至

凋弊然則魂魄歸天明精誠之已遠卜宅於地蓋思慕之所存古者不封未爲非達且墓爲真宅自有便房今乃別造田園名爲下帳又明器等物皆競驕侈失禮違令殊非所宜戮屍暴骸實由於此承前雖有束約所司曾不申明喪葬之家無所依準宜令所司據品令高下明爲節制明器等物仍定色數及長短大小園宅下帳並宜禁絕墳墓塋域務遵簡儉凡諸送終之具並不得以金銀爲飾如有違者先決杖一百州縣長官不能舉察並貶授遠官

贈王海賓左金吾衛大將軍制

盤矛赴敵義光忠壯免胄捐軀情殷悼惜故防禦羣牧使
豐安軍使右衛率府率王海賓七萃楨榦萬里長城抱鐵
石於胸襟運韜鈴於掌握屬犬羊爲寇牧圉罹災出車徇
其征討躍馬先其掩襲挫彼鋒銳殲厥渠魁充國持邊佇
終文略建威臨陣忽喪驍雄興言震懷思有褒美宜加大
將之禮兼茂後昆之秩

封宋王成器長女安吉縣主制

黃門宋王長女流芳桂邸稟訓梧宮體自閒和成其婉婉
玉笋始茂金燧方嚴爰寵錫於脂粉俾開榮於湯沐可封

金定合月五 卷二十一
安吉縣主主者施行

授盧懷慎黃門監制

古稱納言亦號常伯厥命惟允朕之股肱俾乂成績聿歸
良輔黃門侍郎同紫微黃門平章事盧懷慎氣實溫厚生
於薊北年始英妙出相山東王佐所期人師攸屬考彼揚
歷多所獻替學以充其忠謹才以運其清明所謂許國忘
身立朝正色有仲山甫之節成管夷吾之能故其道彌尊
其心益下可以輔我王度弼於朕躬用增輝於侍帷宜拜
寵於參乘可檢校黃門監散官黃門如故

禁畜別宅婦人制

帝王之政必厚風俗男女不別深蠹禮經至如別宅婦人
久未悛革近今檢括配入掖庭將示小懲使及知禁朕愍
其愚惑尚在含宏思屈常憲許其遷善特放出令府縣即
配嫁不得影認更爲藏匿畜別宅人容其自新並宜放免
自今已後更有犯者並準法科斷五品已上仍貶授遠惡
處官婦人配入掖庭縱是媵妾亦不得別處安置卽爲常
式

春令行赦制

青春式序陽和布氣萬物熙熙莫不遂其性而嘉其生也
申念愚人干我王度日陷坑穽置之網羅朕代天理物爲
人父母眷言囚繫良增隱惻豈憲章之尚密將教道之不
明歟順時行令抑惟常典兩京及天下見禁囚除犯惡逆
并造僞闕以前宜決一百配流嶺南磧西諸州其餘一切
放免

賜高麗莫離支及吐谷渾等大首領爵賞制

高麗莫離支高文簡趺跌都督趺跌思太吐谷渾大首領
刺史慕容道奴郁射思大首領鶻屈頡斤大首領刺史苾

悉頡力高麗大首領高拱毅等或遼海貴族或陰山寵裔
知則能勇權而善謀從事本藩頡頡高位料順逆之道知
變通之節或誓以沈族或翻然庇身共驗郅支之亡遂觀
由余之入將軍遇敵永罷射雕使者迎降果聞乘傳棄寒
苦之地就陽和之澤爾其誠矣朕實休之宜開土宇之封
式盛壇場之制文簡可封遼西郡王食邑三千戶行左衛
大將軍員外置同正員賜宅一區馬四匹物六百段趺趺
思太可特進行右衛大將軍員外置兼趺趺都督封樓煩
郡公食邑三千戶賜宅一區馬三匹物五百段道奴可左

威衛將軍員外置兼刺史封雲中郡開國公食邑二千戶
賜宅一區物四百段馬兩匹鶻屈頡斤可左驍衛將軍員
外置兼刺史封陰山郡開國公食邑二千戶賜馬兩匹物
二百段苾悉頡力可左武衛將軍員外置兼刺史封鴈門
郡開國公食邑二千戶賜馬兩匹物四百段宅一區拱毅
可左領軍衛將軍員外置兼刺史封平城郡開國公食邑
二千戶賜馬兩匹物四百段鶻屈頡斤妻契苾賜物一百
五十段手力二人各賜物五十段

授薛訥朔方道行軍大總管呂延祚杜賓客副總

管制

古之命將帥訓甲兵所以宣威武而制戎狄也自非藥郤之裔孫吳之才何以總中軍而絕大漠矣右羽林軍大將軍上柱國河東郡開國公涼州鎮軍大總管薛訥家代名將國朝元臣智湧泉源氣橫雷電廟堂之上則寬而有謀旗鼓之間則勇而無撓頃者單于地隔驕子天亡衆已離心魑魅懸首今則須行弔伐用滅逋逃宜憑推轂之權將待覆巢之勢可持節充朔方道行軍大總管太僕卿呂延祚謀慮經遠才明沈斷右威衛將軍兼靈州刺史杜賓客

三軍之雄萬人之敵以之入幕孰不師臧曾謂出車肅茲
王命並宜充副總管

命徵辟東宮官屬制

黃門朕聞王者神器天之大業震百里而崇孟侯照四方
而建元子其所由來尚矣我國家參天貳地濟以豐功祖
武宗文承於密命顧循菲德寅畏鴻名太上皇命朕以位
卿大夫補朕之闕僉謂率先自邇稽古維新國本之大不
可以不務皇儲之重不可以不立故宵衣當宁聞義是將
朝服外階擇賢而舉皇太子嗣謙生知禮樂性成仁孝字

孫之愛則敬不絕馳問豎之安則恭而至寢觀其言精視
牘思敏題鞭固以覈東序之討論契南山之調護今少陽
踐位獻歲發春草樹自榮乾坤交泰副君之榜已別其宮
太史之書更藏於府帝圖斯永人望所歸庶符知子之明
豈獨在予之慶用施寬惠光於政理今望苑初開端僚是
切天下有高才懋德碩學純儒比迹春卿齊名夏綺具以
徵辟

選耆儒侍讀制

朕聽政之暇常覽史籍事關理道實所留心中有闕疑時

須質問宜選耆儒博學一人每日入內侍讀

放散圍兵制

昔周有岐陽之蒐漢有扶風之命或講師習武夸胡曜威
故王者狩必以時虞人招之以禮時則遠矣朕自祗膺圖
錄於今四年每巡幸郊畿不出百里且愛力而節用豈盤
遊而好樂閒者四方無事百穀有成因孟冬之月臨右輔
之地戒茲五校爰備三驅非謂獲多庶以除害一昨長圍
已合大綏未舉而夜聞朔風天降微雪狐裘且御未免祁
寒鶉衣不充寧堪凍露朕便截狔獸要輕禽以此游娛孰

云矜恤況爲之父母育彼黎元中宵耿然明發增惕其圉
兵並放散各賜布一端綿一屯圍將賜物三十段副使二
十段押官十段岐州兵馬於此給付餘兵馬至京請受

幸鳳泉湯制

詩人賦田以備蒐狩之義王者順時式展畋遊之禮頃者
築場神甸清道子來經上林之苑園指扶風之藪澤雖獵
將提鼓虞人植旗仍憫沍寒之節不行肅殺之命豈惟虞
舜之典咸秩山川所冀周文之風及於鳥獸繇是罷還士
卒非重盤遊眷彼吏人致有煩擾所謂行者幸也后來其

蘇宜申恩惠用符古者所經州縣供承頓官百姓并造營幕橋道等事宜令所司勘會奏聞其緣御路及頓場麥苗有損者亦令實具奏聞

授薛謙光東都留守元行沖副留守制

周命召奭相宅建邦漢命蕭何留臺作鎮眷言斯土任在其人太子賓客昭文館學士薛謙光右散騎常侍元行沖等國之耆儒朝之碩彥舉直錯枉清心不可容非殫見洽聞白首以之從學履歷時久精明日新必能慎固邦畿保釐都邑佇成居守之務宜叶往俞之委謙光宜充東都留

守行冲爲副

幸鳳泉降所過地方刑罪制

凡稱原減頗詳故事罪至死刑寬其大戮況聽成有法閱
實無冤屬陽和上春積雪未降天地之於庶物正亭之而
毒之皇王之撫兆人寧以殺而止殺申念重辟惻然疚懷
特布湛恩助茲生氣其犯斯刑者宜決一百配流遠惡處
其犯杖配流者宜免杖依前配流已決及流三千里者節
級稍移近處二千五百里以下並宜配徒以殿

授邠王守禮襄州刺史制

黃門樹於藩屏莫非親屬居以形勝必任親賢司空兼隴
州刺史邠王守禮德比間平賢於魯衛動不忘於仁恕言
必備於忠肅入連花萼擁駟來朝出割竹符憑熊往鎮睢
茲樊鄧是稱漢沔惟城池之枕倚乃川陸之雄要故鳴騶
戒路建隼爲邦副朕陝東之美更聞峴南之政可使持節
襄州諸軍事兼襄州刺史司空勲如故至州日須稍優游
不可煩以細務自非大事及奏事餘並令上佐知主者施
行

授郾王嗣直等都護制

黃門虞放三苗允歸於敷德周稱二陝用切於聞政頃以
驕子運微匈奴氣盡願爲臣妾者望塞款門編我氓黎者
雲屬波委北窮大漠西被流沙撫而柔之僉曰分命鄴王
嗣直陝王嗣昇聰察天假英明日新忠肅恭懿寬仁孝友
探沛易之彖象自詣精微讀楚詩之比興能傳麗則故可
揚威懷之旨宣靜鎮之風畀以藩翰俾清疆場嗣直可安
北大都護仍充安撫河東關內隴右諸蕃部落大使嗣昇
可安西大都護仍充河西四鎮諸蕃部落大使右衛大將
軍兼安北大都護上柱國長平郡開國公張知運右羽林

大將軍兼安西大都護四鎮經略大使上柱國潞國公郭
虔瓘等國之老臣朝之宿將闕長策子房所以運籌安邊
遠圖充國所以言事必能寬則得衆惠以養人各綏一方
兼委貳佐知運可安北副大都護仍兼鄴王府長史及安
撫諸蕃副大使虔瓘可安西副大都護仍兼陝王府長史
安撫諸蕃副大使餘如故主者施行

封契丹李失活奚李大酺制

混一六合紀綱四海開物所以苞舉華夷列爵所以範圍
中外契丹松漠州都督李失活奚饒樂州都督李大酺等

並材雄劒騎家襲簪組翻飛涿鹿之郊高視無間之地往
屬註惑遂爾攜離海表爲虞在苞桑之厚戒彙征順命乃
連茹而同歸柔懷有章寵渥斯在俾侯利建宜膺胙土之
榮上將師貞仍允齋壇之拜失活可封松漠郡王食邑三千
戶行左金吾衛大將軍大酺可封饒樂郡王食邑三千
戶行右金吾衛大將軍並員外置餘如故

授源乾曜黃門侍郎同平章事制

門下軒夢三相舜舉八元咸佇人傑以宣邦政尚書左丞
上柱國安陽縣開國男源乾曜博文強學達識周才貞白

可以勵時道義可以宏物虛懷同於抱月懸鏡不疲利器
比於成風荆鐘無滯固可充左曹之駁議翊中禁之謀猷
用參金鉉之司兼踐玉臺之制可黃門侍郎同紫微黃門
平章事勲封如故

授宋璟吏部尚書蘇頌同平章事制

門下虞廷稱盛任於夔龍周邦以寧屬於閔散是知出納
惟允必藉英奇啟沃有光實資茂彥銀青光祿大夫守刑
部尚書上柱國廣平郡開國公宋璟字量凝峻執心勁直
銀青光祿大夫行紫微侍郎兼知制誥上柱國許國公蘇

頰風檢詳密藻思清華或掌憲南宮持平邦典或代言西
掖匡輔政途咸竭奉上之心俱盡匪躬之節九流俟其澄
序衆務資其弼諧宜委銓衡兼侍帷幄環可守吏部尚書
兼黃門監頰可同紫微黃門平章事散官勲封並各如故
贈王友貞銀青光祿大夫制

貴德尊賢飾終念往此聖人所以理天下厚風俗也王友
貞稟氣元精遊心太朴孝惟不匱獨貫於神明道則難名
高謝於人代言念錫類方期鎮俗遽爾凋殂良深愍悼生
無大位雖隔外臣之儀歿有餘榮宜贈上卿之服可贈銀

青光祿大夫仍委州縣長官特加弔祭

命故密王元曉再從孫徹嗣爵制

興滅國繼絕代天下歸心焉況乃仁不遺親德必在祀光復土宇率繇教義者哉故徐州刺史密王元曉望重天人地居藩屏家邦伊賴休戚是均乃者王室多難睿圖中缺凡我宗子咸從殛竄神龍初歲寶運紹興爰命近屬以爲後嗣而胄緒凋翳是非紛雜曇子承隙妄尸茅土神且不歆非類人亦奚祀非族奠享無主永懷惻然其封元曉再從孫銀青光祿大夫行太僕少卿員外置同正員東莞郡

開國公徹爲嗣密王以奉其祀

并州置天兵軍制

太原薄伐之地句注出屯之所兵戈不可以不習亭障不
可以不備默啜鳴鏑之餘自貽泯滅骨咄祿男小殺覆巢
之餘仍敢陸梁九姓等雖類頗親而仇讎久著譬彼西戎
已獻郅支之馘同夫東越初雪會稽之恥深憂復怨固請
防萌況高秋在律胡風振野正可以揚武功順殺氣扼茲
地險張我天威宜於并州集兵八萬衆置天兵軍并州長
史上柱國張嘉貞有文武之材勵公忠之操較陳利害頻

奏封章必能料敵於未形臨宜以決勝可充天兵軍大使并州司馬王喬典禮不易其可用也右監門衛中郎將薛徽軍旅之事則嘗聞焉並爲副左拒遼陽之師右連河上之戍車徒列次鼓角傳聲俾其雷斷一方雲橫萬里宏茲廟算稱朕意焉

移蔚州橫野軍於代郡制

戢兵始於威武扼險先於要害以制悍俗用綏遠人九姓等頃立勲庸先除桀驁列在蕃服保其疆宇然而獷戎頗近寇盜時侵雖文德未宏武備素設漢垣通於句注夏屋

枕於燕山是稱近胡量藉遮虜固可節其萬部成犄角之
形屯我六師示張皇之勢其蔚州橫野軍宜移於山北古
代郡大安城南仍置漢兵三萬人以爲九姓之援拔曳固
都督頡質略等並望雄蕃緒聲振朔垂戎略旣昭兵旅惟
緝各陳武列分統軍政頡質略出馬騎三千人充橫野軍
討擊大使同羅都督毗伽末啜出馬騎二千人充橫野前
軍討擊大使霫都督比言出馬騎二千人充橫野後軍討
擊大使回紇都督夷健頡利發出馬騎一千人充大武軍
左軍討擊大使僕固都督曳勒哥出馬騎八百人充大武

金史卷一百一十一 二
軍右軍討擊大使左縈右拂先偏後伍作扞雲代指清沙
漠宣威料敵度功葢務咨爾庶士稱朕意焉其五都督討
擊大使各量給賜物一百匹領本部落蕃兵取天兵軍節
度其兵有事應須討逐探候量宜追集無事並放在部落
營生並使本軍存問務使安輯應修築所及支運兵馬糧
等所司亦與節度使商量處置

征突厥制

書稱四征不庭綏厥兆人可以覆昏亂執有罪保大定功
利物懲慝故高陽有九黎之伐大舜有三苗之征欽若聖

謨是爲殷鑒突厥殺窮漠餘裔大邦逋誅恃其悍俗未遵
朝化比爲潛遁幽茫隔闕華壤固聲朔之不被將羈縻以
畜之而擾我諸蕃窺我邊境今羣方輯睦重譯會同奉琛
執贄者萬數請吏來王者億計咸以爲衆之所加各自統
領師徒取其仇怨拔悉密右驍衛大將軍金山道總管處
木昆執米啜堅昆都督右武衛大將軍骨篤祿毗伽可汗
等弧矢之利所向無前契丹都督左金吾衛大將軍靜析
軍經略大使松漠郡王李失活奚都督右金吾衛大將軍
保塞軍經略大使饒樂郡王李大酺等士馬之精何往不

克並總戎雲萃賈勇風馳西從沙磧至於德犍山下東發
海浦期乎獨活河上九姓拔曳固都督稽洛郡王左武德
大將軍頡質略同羅都督右監門衛大將軍毗伽末啜
都督右驍衛將軍比言僕固都督左驍衛將軍曳勒哥等
種分業異效節輸忠梟彼凶魁掃除遺孽並左犄右角連
營合圍故路絕飛走計窮躍噬然我國家以止戈存義釁
鼓傷仁方欲先德後刑有征無戰庶番之請抑而莫從皇
天有命將不獲已突厥殺若迷而知復困即能通革面虜
庭委身魏闕解其縛焚其櫬有逢伯之前聞大者王小者

侯即田橫之故事沉默啜之子右金吾衛大將軍右賢王
默特勒逾倫自拔於亂頃投於國今不計其先人之僭復
加以右賢之寵右威衛將軍左賢王阿史那毗伽特勒左
武衛大將軍燕山郡王火拔石失畢左領軍衛大將軍阿
婆啜阿史那褐多右驍衛大將軍賀魯室合真阿婆屬等
或彼貴種應繫人思或彼信臣已歸邦化咸從衆望並錫
尊官隨師以籌謀採狄之情狀便立衙帳令居塞垣其首
領百姓等有能轉禍爲福去逆效順爵賞之科國朝有典
且發單于之使諭其觸網之徒優而柔之五申三令儻覆

巢未悟沸鼎猶安習苦爲甘聞言不信則戈矛所接玉石
同焚勉思良圖固替成命朔方道行軍大總管銀青光祿
大夫右散騎常侍攝御史大夫王峻長才多奇大勇不鬪
寄用扞城隱當敵國當出閫之寄有辭第之公故可總是
中軍以宏上略凡蕃漢三十萬衆並取峻節度大戴禮云
王者之征猶時雨也至則人悅之矣俾夫武威外炤仁德
內洽用恢天聲以靜邊徼布告遐邇咸使聞知

賜隱士盧鴻一還山制

昔在帝堯全許由之節緬維大禹遂伯成之高則知天子

有所不臣諸侯有所不友遜之時義大矣哉嵩山隱士盧
鴻一抗迹幽遠凝情篆素隱居以求其志行義以達其道
雲卧林壑多厯年載傳不云乎舉逸民而天下之人歸心
焉是乃飛書巖穴備禮徵聘方佇獻替式宏政理而矯然
不羣確乎難拔靜已以鎮其操洗心以激其流固辭榮寵
將厚風俗不降其志用保厥躬會稽嚴陵未可名屈太原
王霸終以疾歸宜以諫議大夫放還山林歲給米百石絹
五十匹充其藥物仍令州縣送至隱所欲知朝廷得失具
狀以聞

封突騎施蘇祿順國公制

王者懷柔莫不率俾禮其君長必備典章右武衛大將軍
員外置突騎施都督車鼻施啜蘇祿中部貴人右賢豪緒
族系繁於朔野郊廛拒於陰寒自趨風入獻服義來歸爰
奉戎索實司邊行懋勲可紀忠節是嘉俾升絕席之尊仍
茂錫圭之寵可左羽林軍大將軍員外置仍封順國公食
邑三千戶餘如故並賜錦袍鈿帶魚袋七事仍充金方道
經略大使所司備禮冊拜